

## 4.6. S'ELISIONE E S'APÒSTROFU

### 4.6. L'ELISIONE E L'APOSTROFO

Cando s'acostamentu intre duas vocales produit un'atòbiu isgradessidu de sonos, nois faghimus foras sa vocale finale àtona de una paràula cando custa est sighida dae un'àtera chi incumentzat cun vocale.

A su postu de sa vocale chi ruet ponimus unu sinnu chi naramus **apòstrofu**.

Issu inditat chi s'est fata un' **elisione** (dae su latinu *elidere* = fàghere foras, eliminare).

In sa limba sarda s' **elisione est cunsentida** ebbia in sos casos chi sighint:

In sos **articulos diterminativos singulares**, fèmina e mascru, **sa** e **su**:

**s'àmada, s'òmine**

In sos **articulos inditerminativos singulares**, fèmina e mascru, **una** e **unu**:

**un'amada, un'òmine**

In sos **pronùmenes àtonos singulares**:

**mi** (**m'aberit**), **ti** (**t'indito**), **li** (**l'intono**), **ddi** (**dd'incanto**),  
**lu** (**l'ùntinat**), **ddu** (**dd'assustat**), **la** (**l'agatas**), **dda** (**dd'agatas**), **si** (**s'intendet**);

In sas **partigheddas pronuminales monosillàbbicas**:

**nde** (**nd'apo** tentu meda), **nche** (**nch'est** bessidu currende).

S'elisione de sa vocale **no est cunsentida** in sos **verbos** (**ap'apidu**), in sos **agetivos** (**bell'animale**), in sa

**preposizione simplitze** **de** (**binu 'e chentina**) e in totu sos casos non tzitados in antis.